

Dom naroda usvojio Okvirni zakon o osnovnom i općem srednjem obrazovanju na državnom nivou

Misija OSCE-a za Bosnu i Hercegovinu, Vijeće Evrope i Ured Visokog predstavnika pozdravljaju usvajanje Okvirnog zakona o osnovnom i općem srednjem obrazovanju na državnom nivou od strane Doma naroda i pozivaju Parlamentarnu skupštinu da učini hitne korake ka usklađivanju verzija koje su usvojili Predstavnički dom i Dom naroda.

“Usvajanje i implementacija ovog Okvirnog zakona pokazaće da je BiH ozbiljna u svojim nastojanjima da reformira obrazovanje. Zakon obezbjeđuje da se ljudska prava i obrazovni principi primjenjuju na sve učenike širom BiH i od suštinske je važnosti za stvaranje osnova koje će podržavati dalju reformu i modernizaciju obrazovanja”, rekao je ambasador Henry Zipper de Fabiani, zamjenik šefa Misije OSCE-a za BiH.

“Pozdravljamo činjenicu da su ovaj zakon napravili Bosanci i Hercegovci, iako je on samo prvi korak ka obezbjeđivanju kvalitetnog obrazovanja za našu djecu” rekao je viši zamjenik Visokog predstavnika OHR-a, ambasador Gerhard Enver Schrömbgens.

Dr. Sonja Moser-Starrach, specijalni predstavnik generalnog sekretara Vijeća Evrope, čestitala je Domu naroda na njihovoj nepokolebljivoj odlučnosti u podržavanju obrazovne reforme i na zrelosti parlamentarnog procesa.

“Ovo je važan korak za BiH na putu ka ispunjavanju obaveza prema Vijeću Evrope na planu obrazovanja”, rekla je Dr. Moser-Starrach. “Ovaj pozitivan zamah mora biti održan kako bi Parlamentarna skupština poduzela hitne korake u usklađivanju

dvaju usvojenih verzija tako da zakon može stupiti na snagu krajem mjeseca juna.”

Okvirni zakon o osnovnom i općem srednjem obrazovanju na državnom nivou, razvijen uz pomoć Vijeća Evrope, obezbjediće veću mobilnost za sve učenike širom BiH i pomoći proces priznavanja školskih diploma. On će takođe obezbjediti veću autonomiju za škole i povećati učešće i partnerstvo roditelja i učitelja. Zakon će definirati zajedničku jezgru nastavnih planova i programa, jasno istaknutu kao prioritet u obavezama prema obrazovnoj reformi u BiH, usvojenih od strane Vijeća za implementaciju mira u novembru 2002, a koje će omogućiti potpuni i slobodan pristup školama bilo gdje u BiH.

Očekuje se da entitetski i kantonalni zakoni budu dosljedni ovim principima, kao što se očekuje da definiraju detalje upravljanja i obrazovnog procesa. Vijeće Evrope će obezbjediti ekspertnu pomoć u stvaranju nacрта zakona na nižem nivou tako da entitetski i kantonalni zakoni budu u skladu sa ovim principima i mogu stupiti na snagu što je prije moguće.